



Umhverfis- og auðlindaráðuneytið
Skuggasundi 1
101 Reykjavík

Sent í Samráðsgátt stjórnvalda

Reykjavík, 10 febrúar 2021

Efni: Umsögn um drög að breytingu á lögum nr. 48/2011, um verndar- og orkunýtingaráætlun, mál nr. 19/2021.

Samtök atvinnulífsins og Samtök iðnaðarins skila sameiginlegri umsögn um málið en með frumvarpsdrögunum er ætlunin að fella hugsanlega virkjunarkosti vindorku undir ferli svokallaðrar rammaáætlunar samkvæmt lögum nr. 48/2011 um verndar- og orkunýtingaráætlun. Fram kemur að ætlunin sé að nýting vindorku verði óheimil á öllum friðlýstum svæðum og á svæðum sem hugmyndir geta verið uppi um að verði friðlýst. Þá kemur jafnframt fram að nýting vindorku á langstærstum hluta landsins verði háð mati verkefnisstjórnar rammaáætlunar og samþykki ráðherra. Einungis á örlitlum hluta landsins verði nýting vindorku heimil án þessa mats og sérstöku samþykki umhverfis- og auðlindaráðherra. Samtökin leggjast eindregið gegn þessum áformum.

Samtökin telja að með skipulagslögum nr. 123/2010 og landsskipulagsáætlun ásamt aðal- og deiliskipulagsáætlunum sveitarfélaga og einnig með lögum um umhverfismat áætlana nr. 105/2006 og um mat á umhverfisáhrifum nr. 106/2000 ásamt náttúruverndarlögum nr. 60/2013 sé fullkomlega tryggt í lögum að vindorkuver verði ekki reist nema að öllum ítarlegustu umhverfissjónarmiðum sé gætt.

Frumvarpsdrögin eru því óþörf.

Samtökin hafa áður lýst því yfir og vilja ítreka í umsögn þessari að nauðsynlegt sé að endurskoða lög nr. 48/2011 með hliðsjón af því að rammaáætlun var áður sameiginlegt verkefni tveggja ráðuneyta og að umsjón laganna væri betur komið með að vera á hendi tveggja ráðuneyta, þ.e. að atvinnuvega- og nýsköpunarráðherra öðlist jafngildan sess á við umhverfis- og auðlindaráðherra. Þegar rammaáætlun var sameiginlegt verkefni tveggja ráðuneyta var betur horft til allra sjónarmiða. Með lögunum var umsjón með rammaáætlun flutt til umhverfis- og auðlindaráðuneytisins, verkefnisstjórn skipuð af umhverfis- og auðlindaráðherra sem síðan velur í faghópa og skilgreinir verkefni þeirra og hverjir vinna nauðsynleg verkefni. Þetta hefur þýtt að ekki hefur náðst sátt um niðurstöður verkefnisstjórnarinnar eins og nauðsynlegt er og að ekki er litið jafnt til efnahagslegra og félagslegra þátta við mat virkjunarkosta heldur er megináhersla á náttúruverndarsjónarmið. Sjálfbærri þróun samfélagsins til langs tíma hefur þannig verið vikið til hliðar.

Virðingarfyllst,

f.h. Samtaka atvinnulífsins

Halldór Benjamín Þorbergsson,
framkvæmdastjóri

f.h. Samtaka iðnaðarins

Sigurður Hannesson,
framkvæmdastjóri.